

զովեն. մարդու կորայ՝ եպիսկոպոսաց, վար-
դապետաց, մեծատանց շատ, աղքատն սա-
կաւ. շատէն՝ շատ, քիչէ՝ քիչ. մուրացիկքն
պիլա պիտի տան, ոչ թէ կարգաւորքն: Ապա
ուզեն ով ինչ խոստացել է կամ ուխտ է արել, 75
թէ քառասնից, թէ ժամուց, եթէ հողոյ բա-
ժին, թէ մատաղի, թէ խաչի, թէ շուրջառի,
եւ թէ այլ ինչ իրաց, անդ պիտի տրվի:

Իսկ ինձ կայր սիրելի եւ ծանօթ մի եպիս-
կոպոս՝ Ղուկաս անուն. սա եւ ի Լէհ երեկ 80
հետ ինձ նուիրակ¹. ես նորա բազում գործս
եւ բան կատարեցի Ստամպոլ. այլ եւ զիրս
յորով գրեցի նմա եւ զայլ սպասաւորութիւնս
նորա առնէի: Նա տեսեալ զիս յոյժ ուրախ
եղեւ եւ ծանոյց զիս առաջնորդին. քանզի սա 85
տեսուչ եւ վերակացու էր, այլ եւ յաջորդ
պարոնտէրին. եւ զնա առաւել սիրէր քան զա-
մենայն: Սա էա՞ծ զիս օր մի առ նայ. եւ ան-
կեալ յոտս նորա՝ ետու զհողէբաժինս իմ. եւ
նա առեալ օրհնեաց զիս եւ ասէ. «Այլ պիտոր 90
աւելի տայիր, դու Լէհցի ես. ապա Ղուկաս
եպիսկոպոսն գոհ է քէնէ. բազում աշխատանք
եւ խզմէթ արել ես վասն սուրբ Երուսաղե-
մայ»: Եւ ես ասի. «Լէհու վաղ եմ ելել. որբ
մի եմ եւ յաղքատ ծնողաց. այս չափս ալ իմ 95
ձեռացս էմակն է. ընկալ զսակաւս յինէն»: Եւ նա հրամայեաց տալ ինձ օտա մի առան-

73 մուրացիքն: — 77 շուրջառի: — 78 անտ:
— 83 ոլով: — 89 ոտս: — 95 աղքատ:

¹ Այսինքն 1618ին: